



Syrian Armenian Relief Fund

P.O. Box 1948
Glendale, CA 91209-1948
www.syrianarmenianrelieffund.org

Օգոստոս 27, 2012

Կապ.- Սոնա Մատարեան, Ատենադպրուհի
Ե-նամակ: sonamadarian@netscape.net

ՀԱՂՈՐԴԱԳՐՈՒԹԻՒՆ

ՍՈՒՐԻՈՅ ՀԱՅՈՒԹԵԱՆ ԳՈՐԾՆԱՊԷՍ ՆՊԱՍՏԵԼՈՒ ՀԱՄԱՐ

Սուրիոյ տագնապը եւ անոր անմիջական հետեւանքով ստեղծուած սուրիահայութեան տագնապալի առօրեան կ'ահագանգէ ողջ հայութիւնը, զայն մատնելով մտատանջութեան:

Պատմութիւնը, իր ողջ էութեամբ, կը յուշէ ժողովուրդներու անցեալի ու ներկայի ճակատագիրը, իսկ անցեալի հետքերով ենթադրութիւնները կը տանին անորոշութեան ու անձկութեան գիրկը, որուն համար անմիջական հաստատակամութեամբ ու ծառայական ոգիով պէտք է դիմել գործնական քայլերու:

Միացեալ Նահանգներու Արեւմտեան շրջանի հայկական գաղութի երեք յարանուանութեանց, կուսակցութեանց եւ բարեսիրական միութեանց ներկայացուցիչները, ըլլալով արթուն հովիւն ու պահակը շրջանի հայութեան, սրբազան դերով մը համախմբուեցան եւ որոշեցին յառաջացնել «Սուրիահայութեան Օժանդակութեան Գործադիր Մարմին» մը, որպէսզի կազմակերպչական եւ անմիջական դրամահաւաքի աշխատանքներով գաղութը լծուի գործի, շուտափոյթ կերպով տեղ հասցնելու հանգանակուած գումարները, որոնք պիտի ծառայեն կեանքեր փրկելու եւ բարոյական ու հոգեկան ապահովութիւն ներշնչելու Սուրիոյ տարածքին դժուարին պայմաններու մէջ ապրող մեր քոյրերուն եւ եղբայրներուն, ազգային հաստատութիւններուն:

«Սուրիահայութեան Օժանդակութեան Գործադիր Մարմին»ը կազմուեցաւ հետեւեալ կազմակերպութիւններու եւ միութիւններու ներկայացուցիչներով, ու դիւանական պաշտօններու բաժանումով.-

- Հայ Աւետարանական Համայնքի ներկայացուցիչ Տիար՝ Զաւէն Խանճեան, Ատենապետ
- Ա.Մ.Ն.ի Արեւմտ.շրջանի Հայ Օգնութեան Միութեան (ՀՕՄ) ներկայացուցիչ՝ Տիկ. Սօնա Մատարեան, Ատենադպրուհի
- Հայ Բարեգործական Ընդհանուր Միութեան (Հ.Բ.Ը.Մ.) ներկայացուցիչ՝ Տիար Հէրի Պալեան, Փոխ Ատենապետ
- Արեւմտ. Թեմի Ազգ.Վարչութեան ներկայացուցիչ՝ Տիար Մհեր Տէր Յովհաննէսեան, Գանձապահ

- Մեծի Տանն Կիլիկիոյ Կաթողիկոսութեան Ազգ.Կեդրոնական Վարչութենէն՝ Տիար Խաժակ Տիքիճեան
- Հայց. եկեղեցոյ Հիւսիսային Ա.Մ.Ն. Արեւմտեան Թեմի ներկայացուցիչ՝ Տիար Պարգեւ Համալեան
- Հայ Կաթողիկէ Համայնքի ներայացուցիչ՝ Տիար Արա Արոյեան
- Ռամկավար Ազատական Կուսակցութեան (ՌԱԿ) ներկայացուցիչ՝ Տիար Խաչիկ Ճանոյեան
- Հայ Յեղափոխական Դաշնակցութեան (Հ.Յ.Դ.) ներկայացուցիչ՝ Տիար Վարդգէս Նալպանտեան
- Սոցիալ Դեմոկրատ Հնչակեան կուսակցութեան (Ս.Դ.Հ.Կ.) ներկայացուցիչ՝ Տիար Յարութ Ֆազճեան

Վերոյիշեալ մարմինի անդամները անմիջական կապերով ու աշխատանքներով պիտի հասնին մեր ազգի նուիրաբերող զաւակներուն, այն վստահութեամբ որ անոնք հայավայել հաւատարմութեամբ պիտի չզլանան իրենց օժանդակութիւնները, որպէսզի անկարելին կարելի դարձնենք եւ օգնութեան ձեռք երկարենք, ի խնդիր սուրիահայութեան փրկութեան:

Սուրիահայութեան Օժանդակութեան Գործադիր Մարմինը հայրական իր օրհնութիւնը ստացաւ Ա.Մ.Ն.ի Արեւմտ. Շրջանի գոյգ Առաջնորդներէն՝ Տ. Մուշեղ Արք.Մարտիրոսեանէն եւ Տ. Յովնան Արք. Տէրտէրեանէն, ինչպէս նաեւ Հայ Կաթողիկէ եւ Հայ Աւետ. Յարանուանութեանց հոգեւոր Առաջնորդներէն, եւ արդէն անցած է գործնական առաջին քայլերուն:

Արդ, կոչ կ'ուղղենք մեր ժողովուրդի ազնիւ զաւակներուն՝ հետեւիլ հրապարակուած լուրերուն, մամուլի էջերէն, հայկական պատկերասփիւռի կայաններէ, եւ յատկապէս « Գործադիր Մարմին»ի յատուկ կայքէջէն՝ www.syrianarmenianrelieffund.org, եւ ըստ կարելւոյն փոխանցել ձեր առատաձեռն նպաստը:

Նիւթական օժանդակութիւնները կարելի է յղել հետեւեալ հասցէին.-
 SYRIAN ARMENIAN RELIEF FUND
www.syrianarmenianrelief fund.org
 POBox 1948
 Glendale, Ca 91209-1948

Սուրիահայութեան Օժանդակութեան
 Գործադիր Մարմին